

Prof. Faruk Filipović

Dana 19.11.2001. godine u svojoj 78. godini napustio nas je dragi i cijenjeni profesor Faruk Filipović.

Profesor Filipović, dipl.inž.geodezije, rođen je 19. marta 1924. godine u Sarajevu, gdje je pohađao osnovnu školu i gimnaziju, koju je završio 1943. godine.

Po završetku gimnazije, od marta do septembra 1944. godine, radio je u rudniku Kakanj, a nakon toga odlazi u N.O.B., gdje je ostao do oslobođenja, tj do marta 1945. godine.

Na Geodetski odsjek Građevinskog fakulteta u Beogradu upisao se koncem 1945. godine gdje je diplomirao u junu 1950. godine. Nakon diplomiranja radio je, u svojstvu mlađeg inženjera od avgusta do decembra 1950. godine, na Građevinskom fakultetu u Beogradu, kod prof. Dražića, kao v.d. asistenta na predmetu "Fotogrametrija". Decembra iste godine došao je na Tehnički fakultet u Sarajevu i postavljen kao asistent na predmetu Geodezija, na kojoj dužnosti ostaje do maja 1952, kada je prešao na rad u Geodetsku upravu pri Vladi BiH u Sarajevu.

Od februara 1954. do septembra 1960. godine radi kao profesor Fotogrametrije i Geodezije na Geodetskoj tehničkoj školi u Sarajevu. Septembra 1960. godine izabran je za profesora Fotogrametrije na Višoj geodetskoj školi u Sarajevu, na kojoj je predavao sve do 1974. godine.

U vremenu od januara 1962. do jula 1964. godine bio je direktor Geodetskog zavoda u Sarajevu. Za to vrijeme bio je honorarni profesor na Višoj geodetskoj školi.

Od oktobra 1970. do polovine 1974. godine po pozivu predaje Fotogrametriju na Rudarsko-geološkom fakultetu u Tuzli.

Godine 1974., pošto je osnovan Geodetski smjer (odsjek) na Građevinskom fakultetu Univerziteta u Sarajevu, profesor Filipović prelazi na Građevinski fakultet biva biran u zvanje docenta, a potom i vanrednog profesora za oblast Fotogrametrija, koju predaje sve do 1981. godine, kada zbog bolesti prestaje sa radnim aktivnostima.

U ovom periodu obavljao je funkciju prodekana i dekana Građevinskog fakulteta Univerziteta u Sarajevu.

U toku rada prof. Filipović je bio na slijedećim specijalizacijama:

- 1952. godine mjesec dana u Zavodu za fotogrametriju u Beogradu,
- 1955. godine mjesec dana u Minhenu na kursu "Photogrametri sche woche", pri Technische hochschule u Minhenu,
- 1957. godine na Fotogrametrijskom kursu pri Rechnischule u Zurichu kod prof. Zellera.

Napisao je slijedeće radove:

- "Fotogrametrija" predavanja za studente Više geodetske škole, Sarajevo 1974. godine

- "Fotogrametrija", predavanja za studente Rudarsko-geološkog fakulteta u Tuzli
- "Primjena terestričke fotogrametrije u rudarstvu". Ovaj rad prihvaćen je i odbranjen kao habilitacioni rad na Rudarsko-geološkom fakultetu u Tuzli, februara 1974.godine,
- "Primjena terestričke fotogrametrije u rudarstvu", referat podnešen na I. Simpozijumu o rudarskim mjerenjima, Rabac, 24-26 maja 1973. godine,
- "Primjena terestričke fotogrametrije kod površinskih kopova", referat održan na Naučno-tehničkom savjetovanju o inženjerskoj geodeziji, Mostar, 11-12 aprila 1974. godine.

Prof. Faruk Filipović bio je aktivan društveni radnik.

U Savezu geodetskih inženjera i geometara aktivan je član i često funkcioner, a 1972. godine izabran je za zaslužnog člana SGIG bivše Jugoslavije. Bio je član Sindikata prosvjetnih radnika, u kojem je bio predsjednik Opštinskog odbora, a bivao je član Republičkog i Saveznog odbora. Bio je član Predsjedništva Zajednice geodetskih visokoškolskih ustanova kao i Zajednice viših tehničkih škola bivše Jugoslavije.

U 1960. godini odlikovan je Ordenom rada III reda.

Iz ovog bogatog životnog, stručnog i naučnog opusa profesora Filipovića, može se izvesti zaključak da je bio doajen fotogrametrije u Bosni i Hercegovini, kao i jedan od doajena u oblasti obrazovanja geodetskih stručnjaka, a posebno u segmentu visokog obrazovanja.

Na kraju, krasile su ga osobine čovjeka i kolege prijatnog za saradnju, kako u službenim tako i u privatnim komunikacijama, što je kod kolega, posebno mladih izazivao, simpatije i naklonost.

Hvala mu na svemu !

Faruk Selesković